

## ‘A MARENNA

All’antu  
‘u laùri èni l’ùnna rô mari  
e ‘i mitituri,  
marinari ri terra,  
nô vespri abbuccàti sutta ô suli  
nto vighali ammausannu nàtunu  
annijati ‘i sururi.

All’erta  
‘u capurali r’ogni tantu s’addrizza  
e finarmenti :- Arriva ! -  
Eni ‘a massara ca veni rê casi  
e cuannu arriva  
lesta  
sutta ‘a maccia ‘a cannavazza stira  
e ciama :- ‘A marenna ! -

Arràncunu ‘i picciuotti, tiniènnisi ‘u schinu,  
e ntall’ùm’ra trasunu attuornu,  
a-ccucunièddu o addinucciùni ;  
e mentri l’uècci sicutunu ‘u nziru ppi ‘n sursu ca stuta l’arsura,  
‘a manu stenni ‘u ‘llammicu ppi ‘n muorsu ri pani  
e n’alìva,  
e ‘na cozza ‘i cipudda,  
e ‘na fogghia ‘i lattuca spunzata nt’acitu ;  
e ppô cori  
ancora  
ccâ ‘bbramu rô labbru ca penni : ‘m mmasuni -- Ccâ saluti !-- ,  
ô carratièddu ca passa nô gghìru,  
sbigghiànnu l’arduri a cu spennì ‘n’allecra risata  
e a cu cunta ‘a passata ‘i ‘n cucciddu ri vita :” Ju.. ‘na sira.. a Rausa ...”  
Ma è gghià l’ura  
e ‘u capurali si susi :-Bbiniritta !--

Nisciènnu  
l’ùm’ra strazzunu cchê pieri,  
e all’antu, ntâ ristuccia ,  
cummattiennu,  
r’agn’unu ‘a so lenza trasciunìa  
sutta ô suli,  
anzina a cuannu codda.